

供養是人所獲果報多不梵王白言甚多世尊甚多善逝佛言若人受持聖觀自在菩薩一百八名乃至須臾禮拜供養二人果報正等無異梵王當知受持讀誦聖觀自在菩薩一百八名獲得如是無量無邊福報之利何況盡形受持讀誦所獲功德世生生不可窮盡爾時世尊說是語已大梵天王及天帝釋天龍八部一切大衆聞佛所說信受奉行聖觀自在菩薩一百八名經

佛說目連所問經

宋西天三藏朝散大夫試鴻臚少卿傳教大師法天奉 謹譯

如是我聞一時佛在王舍城竹林精舍爾時尊者大目犍連於夜後分從自住處往詣佛所到已投地頂禮佛足於一面坐彼時尊者大目犍連即從座起白佛言世尊若有苾芻則五苾芻尼迷醉犯戒無慚無愧輕慢律儀行非法行世尊彼等云何而得其福世尊告言尊者大目犍連若有苾芻苾芻尼迷醉犯戒無慚無愧輕慢律儀行非法行彼人命終生地

獄中壽等四大王天五百年計人間歲數九
百萬歲尊者大目犍連復白佛言世尊若有
苾芻苾芻尼迷醉犯戒無慚無愧輕慢律儀
不依說法彼等云何而得其福世尊告言尊
者大目犍連若有苾芻苾芻尼迷醉犯戒無
慚無愧輕慢律儀若不依說法彼人命終生
地獄中壽等忉利天一千歲計人間算數三
俱胝六萬歲尊者大目犍連白佛言世尊若
有苾芻苾芻尼迷醉犯戒無慚無愧輕慢律
儀行波逸提法彼等云何而得其福世尊告

言尊者大目犍連若有苾芻苾芻尼迷醉犯
戒無慚無愧輕慢律儀行波逸提法彼人命
終生地獄中壽等夜摩天二千歲計人間算
數一十四俱胝四百萬歲尊者大目犍連白
佛言世尊若有苾芻苾芻尼迷醉犯戒無慚
無愧輕慢律儀犯吐羅鉢底法彼等云何得
多福利世尊告言尊者大目犍連若有苾芻
苾芻尼迷醉犯戒無慚無愧輕慢律儀犯吐
羅鉢底法彼人命終生地獄中壽等兜率陀
天四千歲計人間算數五十七俱胝六萬歲

尊者大目犍連白佛言世尊若有苾芻苾芻
尼迷醉犯戒無慚無愧輕慢律儀犯僧伽婆
尸沙法彼等云何得多福利世尊告言尊者
大目犍連若有苾芻苾芻尼迷醉犯戒無慚
無愧輕慢律儀犯僧伽婆尸沙法彼人命終
則五
生地獄中壽等化樂天八千歲計人間算數
二百三十俱胝四百萬歲尊者大目犍連白
佛言世尊若有苾芻苾芻尼迷醉犯戒無慚
無愧輕慢律儀犯波羅夷法彼等云何得多
福利世尊告言尊者大目犍連若有苾芻苾

芻尼迷醉犯戒無慚無愧輕慢律儀犯波羅
夷法彼人命終生地獄中壽等他化自在天
一萬六千歲計人間算數九百一十五俱胝
六百萬歲尊者大目犍連聞佛說已心大歡
喜作禮而去

佛說目連所問經